

Jahresbericht der Trachtengruppe Gurzelen 2023

Mir vom Vorstang hei das neue Jahr mit der obligatorische Sitzig agfange am 11. Januar u hei d Houptversammlig vorbereitet.

Mit der erschte Singprob hei mir am 18. Januar gschtartet.

D Houptversammlig am 3. Februar isch ohni grossi Disskusione über d Bühni gange. Mir hei vier nöii Mitglieder dörfe im Verein ufnäh nach ihrem Probejahr. D Stefanie, Manuela, Anina u d Elena.

Am 12. Februar si Hanny, Hanspeter, Hans-Ueli u i uf Frutige a Delegierteversammlig vom BKJV. I finge das gäng schön so vieu Jodlerlüt zträffe.

Trachtegruppe het am 6. März d Vereinsdelegierteversammlig düregführt im aute Schuelhüsli. Dert hets du afe nächeri Infos gäh zum Jubiläumsfescht vom Männerchor u mi het z Jahresprogramm vom ganze Dorf zämegschteut.

Üses ältische Gründigs-u Ehremmitglied Hedy Wenger isch am 9. März gschorbe. Hedy isch fasch 103 Jahr aut worde. Truurfür het im chline Rahme stattfunge. Zum Abschied hi mir vor Trachtegruppe am Pfarrer es paar Gedanke zur Erinnerung a Hedy ufgschriebe, für vor z läse.

DV vo der Gürbetaler Jodlervereinigung isch am 10. März ds Englisberg düregführt worde vom Längebärger Jodlerchörli. Hans-Jörg u i hei dert teilgnoh.

Am Paumsuntig 2. April isch üses Trachte Zmorge gsi. Mir hei wieder sehr vieu Lüt gha u es wird sehr gschetzt was mir aus abiete. Das isch haut o gäng mit vieu Arbeit verbunge! Danke aune ganz hätzlech füre Isatz.

Am 30. April si mir uf Wattewil i ds Auters- u Pflegeheim ga singe u tanze. Mir chöi dene Bewohner au Jahr chli Abwächslig i Heimautag bringe. Im Pflegeheim wo mir vo eir Abteilig zur angere hei gwächslet het z Anni Meier e Stägetritt verfäut u isch gschtürzt, grad ufe Arm. Z Chrankeouto het z Anni greicht u mir hei du Bricht übercho das es der Arm broche het u no es Chnöcheli abgschpliteret im Euboge. Anni het müsse operiert wärde. Es isch aber nach längerer Reha Gott sei Dank aus wieder gut cho.

Hans-Jörg Schneider het am 4. Juni si 60. Geburtstag gfiiret u mir vom Chörli hei o dörfe ga Zmittag ässe. Mir si richtig verwöhnt worde u hei e zfriedene Tag erläbt. Mit es paar Lieder hei mir o chli öpis zu däm Fescht chönne bitrage. Danke vieu mau Hans-Jörg für d lladig u dä schön Sunntig.

Am 30. Juni isch z Brätle gsi i der Gürbebadi z Mühlethurnen. Hans-Ueli u i si denn z Mallorca i de Ferie gsi u hei nid chönne derbi si, aber so wie i ha gehört isches wieder e gmühtleche Abe gsi.

Vom 18. bis am 20. Ouguscht isch z Jubiläumsfescht vom Männerchor uf em Programm gschtange. Aui Vereine vo Gurzele hei mitghulfe die Aläss dürezführe. Am Fritigabe isch d Jubiläumsfiir gsi wo Trachtegruppe het gsunge u tanzet. O verschiedeneni Männerchör u d Linedancers si ufrätte. Es Jubiläums Nachtässe u vieu Gratulatione hei o nid dörfe fähle. D Trachtegruppe het mit de angere Ortsvereine e Biergarte baschtlet u e Bietrag a d Vereinsreis gschänkt. Der Präsidiänt vo der Musig, Michael Hodler het Gratulationsred übernoh.



Am Samschtig hei mir kei Isatz gha u hei numme dörfe z Fescht gniesse bi däm wunderbare Wätter.

Füre Sunntig isch der Amtssängertag agseit gsi. 10 Persone vo üsem Verein hei bim Mittagsbankett im Service mitghulfe. Es het aus gut klappet u der Männerchor isch dankbar gsi für üsi Hieuf.

Z Rüeggisbärg i der Chiuche het z Jodlerdoppelquartett Gibelegg wo z Jodlerträffe düreführt e Gsammtchorprob organisiert. Hanny, Anne-Catherine, Hans-Ueli u i hei dert teilgnoh am 22.Ouguscht.

Über z Wucheänd vom 26.u 27. Ouguscht isch z Kirchdorf es Dorffescht agseit gsi. Mir vor Trachtegruppe si agfragt worde ob mir am Samschtig wete Ufrätte i der Chiuche. Das isch ja gäng e Glägeheit e chli Wärbig z mache für üse Verein u so hei mir zuegseit. Am Abe uf die siebni hei mir du i der Chiuche Kirchdorf törfe singe u tanze. Si hei leider nid so Wärbig gmacht für dä Alass drum si o nid vieu Lüt cho luege u lose. Abgmacht isch gsi das mir d Kollekte überchömmme aus Gage aber si

hei du us der Feschtkasse ufgrundet uf dä Betrag wo mir süsch o überchömmen bime Uftritt. Mir si du aschliessend no chli ga luege was süsch aus louft u es isch du no e ganz zfriedene Abe gsi.

Z Gürbetaler Jodlerträffe isch am 10. Septämber z Rüeggisbärg vo de Gibelegger däregeführt worde. Es isch e wunderbare Herbsttag gsi mit usergewöhnlech summerleche Tämperature. Mir hi auso gschwitzt wie im Juni aube ame Jodlerfescht. Aber o vieu sehr schöni Vorträg hei mir dörfe lose.

Üsi Vereinsreis het üs i däm Jahr am 23. Septämber mit Engloch Car a Louenensee geführt. Leider het z Wätter nid mitmacht u es isch der ganz Tag chli verhäicht gsi u het grägelet. Am Abe wo mir no i der Chemmihütte z Aeschried hei Znacht gässe hets chli ufta u mir hei doch die schöni Ussicht chönne gniesse. Es isch glich e gmühtleche Tag gsi wome nid numme im Car ghocket isch.

Am 22. Oktober isch z Jantar-Matinee Konzärt däregeführt worde. Aus Gaschtformation hei si der Jodlerklub Burgistei angaschiert gha u mir hei dörfe d Feschtwirtschaft führe. Dank däm das si vieu meh Wärbig hei gmacht isch der Saau fasch vou gsi mit Bsucher. Es isch ganz es schöns Konzärt gsi u üsi Feschtwirtschaft het wie gäng beschtens klappt u isch sehr gschätzt worde.

Da mir ja es Probewucheänd plane z Habkere si Therese, Barbara mit em Julian u i am 24. Oktober ga das Lagerhuus besichtige u när no ga es Chrankebsüechli mache bi der Tanja wo het müsse d Mandle operiere.

Sunntig der 29. Oktober isch der Ärntdankgottesdienscht wo mir jedes Jahr dörfe singe. Es isch gäng schön i der Chiuche chönne z singe. Aschliessend a Gottesdienscht hei mir o no ufem Platz use paar Lieder vortreit u när hets es Appero gäh für aui.

So u jetz isch wieder üsi strängschi Zyt wo chunnt us Sicht vom Verein. Donnschtig der 23. November isch Houptprob gsi. Das isch gwüss ganz guet gange.

Samschtig 25. u Donnschtig 30. Novämber so wie Samschtig 2. Dezämber hei mir üsi Ungerhautigsabe däregeführt. Es si drei erfougriichi Abe gsi mit vieu aber nid übervieu Bsucher. Aus het beschtens klappet bim Singe, Tanze, Theater, Tombola u bi der Feschtwirtschaft. Öich aune ganz es grosses Danke für dä Isatz. Es geit haut numme we aui am gliche Strick zieh u mithäufe u das merke o Gescht u schätze das sehr.

I wett aber o no mau ganz härzlech DANKE säge für di Überraschig wo dir mir am letschte Abe heit bereitet u mi zum Ehremitglied erklärt heit u das wunderschöne Zyt überreicht. Danke vieu vieu mau!

Am 9. Dezämber het der Männerchor no zum Häuferässe iglade. Es het es Spaghettibuffet gä u Glace zum Dessär. Der Männerchor het paar Lieder gsunge, vieu Dankeswort a aui grichtet u Biuder la loufe vom ganze Fescht. Es isch ganz e zfriedene Abe gsi.

D Seniorewiehnachte isch am 13. Dezämber düregführt worde. D Schüler hei üs mit eme Theaterli, Lieder u Musig dä Abe ghufe verschönere. Der Pfarrer Andrea Fabretti het e churzi Gschicht vorgläse u e Gruppe Behinderti wo bim Hanny im Kurs a der Volkshochschul si gsi hei mit üs zäme e Uftritt dörfe ha u z Lied Däheim vortreit. Aschliessend a d Wiehnachtsfiir hets es Paschtetli gä. Mir hei du o no gsunge u tanzet wie aui Jahr. Es isch eifach schaaaad für dä Ufward wo mir betriebe, dass numme grad 17 Seniore, ohni die wo zum Verein ghöre, si cho.

Nach däm du die Seniore hei si gange isch du no Daniela Rohrer chli gfiiret worde wo grad a däm Tag isch 60zgi worde. Mir hei der Daniela e Schärischnittlatärne gschänkt für ufe Baukon u der Aschi het üs verwöhnt mit feiner Turte. Merci vieu mau.

Der Autjahrshöck isch der letscht Alass vo üsem Vereinsjahr. 49 Persone si am 27. Dezämber i ds Randes-Vous uf Wattewil ga Znacht ässe. Mir hei im vorus chönne useläse was mir wei ässe u das het beschtens klappt u isch fein gsi. Aui Getränk u Dessär si vo der Daniela Rohrer gschpändet worde a steu vome Geburifescht. Danke no einisch vieu, vieu mau!
So isch üses Vereinsjahr mit eme zfriedene Abe usklunge.

I danke der Dirigäntin Hanny Burri u de Tanzleiter Daniela u Ernst Rohrer ganz härzlech für dä Isatz dür z ganze Jahr.

Der Musigkommission, der Theaterkommission, de Theaterlüt u o de Rächnigsrevisore es ganz grosses Merci für di wichtige Ufgabe wahrznäh i üsem Verein.

O Öich Vereinsmitglieder danke i für die gueti Zämearbeit.

Es ganz grosses MERCI geit a Öich liebi Vorstandsmitglieder für d Ungerstützig u z mittrage i aune Situatione.

Für z nöiie Vereinsjahr 2024 wünsche i aune gueti Gsundheit, u vieu schöni, gmühtlechi u erfougriichi Erläbnis mit der Trachtegruppe Gurzele.

Im Jäner 2024

Öii Präsidentin

Marianne Reust

